



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

Symbolum XCVII. Mercurius.

[urn:nbn:de:hbz:466:1-68709](#)

SYMBOLVM XCVII.

Mercurius.

Ex Variis.

Ethicè.

1. Vis eloquentiæ.
2. Pacis studium.
3. Mercurius imago Legati.
4. Cur vitulus Mercurio sacer. Cur ei lingua dicata. Eius cancer.
5. Judicium corruptum.
6. Cur furum deus?
7. Cur mendax, simul & furax.
8. Eundum, qua Deus vocat.
9. Indoctus, Mercurius est truncus.

IOvis, & Majæ Nymphæ, filius hic deus fuit: ita dictus à *mercibus*, eò quòd Mercatoribus præesse existimaretur; Græcis *Hermes* vocatur, ἀπὸ τῆς ἐγνωσίας, hoc est, ab interpretando. Aliqui putant appellatum esse, quasi *Medicurum*, quòd interpres sit deorum, & oratio inter loquentes duos currat & reciprocetur. Vel quòd medius inter deos, tanquam ipsorum internuntius currat. De quo Claudianus lib. 1. de Raptu.

Atlantis Tegæ nepos, commune profundis
Et Superis Numen, qui fas per limen utrumque
Solus habes, geminóque facis commercia mundo.

Idem *Cylenius* nominatus est, vel à *Cyrene* monte Arcadiæ, in quo nutritus & diversatus est; vel quòd omnem rem sermone sine manibus conficiat: quibus partibus corporis qui carent, νυμφοι vocantur; ideoque truncus Hermes sine manibus sculptur. In pedibus habet talaria, galerum in capite, in manu virgam (Latinis caduceum, Græcis κηρυκέον) quâ animarum alias orco evocat, alias in Tartara mittit, ventos concitat, tranatque nubila. Virg. 4. Aeneid.

Tum virgam capit: hac animas ille evocat orco
Pallentes, alias sub tristia Tartara mittit:
Dat somnos, adimitque, & lumina nocte resignat.
Illa fretus agit ventos, & turbida tranat.
Nubila.

Huius simulacrum Ægypti partim atra facie, partim aurea & clara confinxere, quia modò ad Superos, modò ad Inferos adiret. Eiusdem apud

apud eosdem simulacrum conspiciebatur geminum, alterum senili vultu venerandum, alterum florenti juventa, ut significarent eum, qui Reip. munia obire ritè velit, cum animi prudentia debere vires habere conjunctas. Caduceus eius geminis anguis circumdatur, mare & femina, mutuo nexus circumvolutis, caudisque ad capulum virgæ demissis: quibus concordia significatur. Hunc primum fuisse inquit, qui Lyram invenerit; quam etiam Apollini, cùm pax inter illos, post litem ex furto ortam, reconciliata fuisset, dono dedit. Unde *Lyra*, quasi *lytra*, à λύρᾳ, pretium scilicet redimendis captivis, dicta est. Erat autem testudo, quæ χέλυς à Græcis vocatur, hunc in modum formata, ut ait Lucianus in dialogo Apollinis & Vulcani. Cùm Mercurius testudinem mortuam ad Nili ripas forte invenisset, brachia adaptavit, ac jugum induxit, calamósque postea agglutinans, & subiecto quodam fundo, ac novem deinde chordas super calamis tanquam ansulis intendens, jucundum quid modulatus est. Hanc testudinem Apollini boves Admeti regis pascenti, & ab eos à Mercurio clam abactos irascenti donavit: ab eoque vicissim caduceum accepit, seu virgam illa vi præditam, ut facile pax inter quosvis per eam conciliaretur. Cuius rei cùm vellet facere experimentum Mercurius, conjectit virgam inter duos serpentes, acerrimè inter se dimicantes, qui repente in concordiam redacti, postea Mercurialis virgæ insigne extiterunt.

Varia sunt dei huius officia: præcipuum, quod deorum sit Legatus & internuntius. Idem *Manibus* defunctorum præest, & *Palestra*, & *Musica*, & *Eloquentia*, & *Astrologia*. Primus enim astrorum & siderum cursus observasse, & annos ad certum ordinem redegitur. Rei quoque *mercatoria*, & artis *furandi* Præsidem agit, quam ipse à teneris unguiculis exercuit. Nam etiamnum parvulus Veneri cestum seu cingulum subduxit, Jovi sceptrum surripuit, fulmen quoque clepturus, nisi vim timuisset flamarum: Apollini ob furtum, sagittas in eum jaculari paranti, arcum sublegit, & pharetram evacuavit. Argum centoculum Jūs (Inachi filiæ à Jove in juventæ formam mutata) custodem soppivit, sopitum occidit, & vaccam abduxit. Memoria proditum est, *Autolycum*, eius filium, Laërtæ patrem, qui fuit avus Ulyssis, omnium propè mortalium pauperrimum, artem furandi à Mercurio didicisse, indeque ditissimum evasisse. Artis certè paternæ tam peritus fuit filius, ut, cùm optimum equum furatus fuisset, asinum scabie corrosum pro illo restituerit: cùmque alteri pulcherrimam sponsam rapuisset, anum edentulam, mucosam, & gibbam reddiderit. Id quod etiam in commutandis

G g g

mutandis

mutandis mercibus faciebat , non sine præstigiis , quas diuinus genitor primas excogitavit. Artem mentiendi & furandi ex avo haustam Ulysses strenue prosecutus est , præsertim in obsidione Trojæ , & surreptione Palladii. Sed & Sinon (is , qui Græcis Trojam prodidit) filius Sisyphi , nepos ex alia matre Autolyci , ab avito sanguine non degeneravit. Meruit ob hoc Mercurius , ut eius statuae pro foribus domorum ab antiquis erigerentur , quia fur credebatur cæteros fures arcere : cum tamen juxta proverbium , *fur cognoscat furem , & lupus lupum.*

Artes Mercurii describit eleganter Horatius Od. 10. lib. 1.

Mercuri facunde , nepos Atlantis ,
Qui feros cultus hominum recentum
Voce formasti catus , & decoræ

More pæstræ.

Te canam magni Jovis , & deorum
Nuntium , curuæque lyræ parentem ,
Callidum , quidquid placuit , jocoso

Condere furto.

Te boves olim nisi reddidisses
Per dolum amotos , puerum minaci
Voce dum terret , viduus pharetra

Risit Apollo.

Quin & Atridas , duce te , superbos ,
Ilio dives Priamus relicto ,
Thessalosque ignes , & iniqua Trojæ
Castra febellit.

Tu piás latis animas reponis
Sedibus : virgáque levem coérces
Aureâ turbam , Superis deorum
Gratus & imis.

Quo carmine docet Poëta , Mercurium Elocutionis & Facundia
deum esse ; feramque & agrestem hominum vitam expolivisse non voce
solum & oratione , verum etiam artificio & venustate decertandi in pa-
læstra : esse solertem , callidum , acutum in artibus tam bonis , quam
malis. Potuit verò Mercurius non se tantum , sed alios etiam , quos du-
cebatur , inaspectabiles facere : id quod de Gygis annulo , & Orci seu Plu-
tonis galea dicitur. Hinc adolescentis induitā personā , Priamo se du-
com

cem præbuit ad Achillis naves per media Græcorum castra eunti, & Hectoris filii corpus, sepeliendi causā, ab Achille redimere cogitanti.

Ethica.

I. (a) Per auream, potentemque Mercurii virgam intelligas vim atque virtutem Eloquentiæ, seu facundæ Sapientiæ, quæ mirum habet in mortalium animos imperium. *Qui sapiens est corde*, ait Salomon Prov. 16. *appellabitur prudens: & qui dulcis est eloquio, majora percipiet*. Id est, præclariora præstabit. Neque enim satis est, eloquentiam corde contineri, nisi suavi, nervosoque depromatur eloquio. Quid est enim Mercurium alas habere in pedibus, nisi virum sapientem & disertum velocissimo cogitationum volatu per diversos argumentorum locos ferri ad rem verosimilem reddendam? Quid concitare ventos, quam dominari in varios hominum affectus? Quid sopire vivos, & excitare mortuos, quam orationis efficacia in omnem partem impellere audientes? ut siue bellum sit ineundum, omnes conculcent arma; siue pax eligenda, gladium dimittant omnes. Quid enim, inquit Tullius lib. 1. de Orat. tam potens est atque magnificum, quam populi motus, Judicium religiones, Senatus gravitatem unius oratione converti? Quid tam regium, tam liberale, tam munificum, quam opem ferre supplicibus, excitare afflitos, dare salutem, liberare periculis, retinere homines in civitate? Quid autem tam necessarium, quam tenere arma, quibus vel tectus ipse possis, vel provocare improbos, vel te ulcisci lacerbitus? Hæc ille. Credebatur hic idem deus animas orco evocare, hoc est, ex locis illis obscuris & tenebris in lucem producere. Hoc ipsum est, quod potest eloquens Sapientia, quæ intellectum auditorum illuminat, mentis tenebras discutit, & ad veritatis cognitionem, amoremque virtutis perducit. Vis Soporifera huic virgæ indita, valet ad sedandas animorum perturbations ac concitationes, mortuösque, hoc est, sceleratos à flagitiis ad vitam hominem dignam revocandos. Quidam per talaria intelligunt negotiantum, alii medentium celeritatem, quæ adhibenda, siue quæstum facere, siue morbos depellere velis. Sunt autem Medici, qui animas ad inferos mittunt, & iterum revocant; dum eorum alii desperatos à morbis exfuscent; alii non desperatos ad orcum demittunt.

II. (b) Mercurius, Caduceator seu Caducifer, legati pacifici exemplar est, quia medius, imos, summósque deos conciliat, & pugnantes

G g g z inter

(a) Vis Eloquentia. (b) Pacis studium.

inter se serpentes , virgā interpositā , in pacem & amicitiae complexum rursus conjungit. Silius canit :

Pax optima rerum ,

Quas homini novissē datum est. Pax una triumphis
Innumeris potior.

Et Seneca :

Pacem reduci velle , victori expedit ,
Victo necesse est.

Nulla suada dulcior est , quām quæ dissidentes conciliar , & iras in mansuetudinem vertit.

III. (c) Mercurio per limen utrumque Superū & Inferū via patet. Eadem est Legati , jure gentium securitas , & sacrosancta immunitas. Et quia multum in utramque potest Legatorum efficacia , censentur Superos adire , quando prudenti agendi ratione , & humanitatis sensu avertunt à vivis (qui etiam superi vocantur) bella , clades , funera ; ad inferos verò se conferunt , cùm sanguinis aviditate discordias Principum concitant , fovent , augent , & vivos per varias strages præcipitant in orcum. Mercurius atra & aurea facie pingitur ; Legatorum multi , (five alias Principum internuntios & ministros aulicos intelligas) corrupti muneribus : hinc obscuris , ac perplexis dictis , responsis , re latis , vera falsis , & falla veris involuunt , nebulasque iis , à quibus missi sunt , offundunt. Quod fortassis etiam Galerus seu petasus , latior Mercurii pileus , alludit ; nam obumbrante illo tegumento denotatur Simulatio , quam fronte & vultu sustinent homines versuti ad orationis fallacias regendas facti. Possit etiam dicere , legatum Mercuriali petaso tegendum ; ut meminerit , negotia sibi commissa in secreto habenda. Significatur quoque galero hoc , per eloquentiam homines defendi , atque ab injuriis protegi. Pingitur insuper Mercurius dextram obarmatus gladio falcato , quam harpen vocant , caputque galea , chlamydéque , ac brevi accinctus tunica , qualis Argum occidisse fertur. Quibus rebus indicatur , eloquentiam armis junctam , plurimum adversus hostes , qui sèpe ratione sola ac voce non moventur , valere. Item , ut discas , si pace (quæ per caduceum denotatur) frui volumus , exerendam harpen , hoc est , bellum esse gerendum. Ciceronis in 7. Philipp. dictum est : Si bellum omittemus , pace nunquam fruemur. Et axioma polemicum est : cùm tractatur de pace , metus faciens est hosti ; ne ignavum & vile aliquid animal videare. Vetus verbum est , melius sub clypeo succede-

(c) *Mercurius imago Legati.*

re pacis negotium ; ut verè pax ea sit, non pactio servitutis. Hinc est, quod Mercurius cum Hercule palæstris dicatur præesse : est enim prudenter jungenda viribus. *Inuentus* verò & imberbis Mercurii facies significat, Oratori opus esse ingenio vivido & vegeto. *Gallus* etiam gallinaeus solet Mercurio appingi, quō innuitur, opus esse vigilantiā ad opes aut sapientiam aspirantibus. Facies illa partim atra, partim aurea, de qua suprà, docet, eloquentiam tam improbis, quam probis impertiri. *Herme* statua, quadrato lapidi vel insidens, vel iussitens, significat, rationem & veritatem, perinde ut forma quadrata, erectam semper stare. Nam rationis & veritatis quoque deum fuisse Mercurium antiquis, ait Pierius. Ingeniosius per basin quadratam Artes significantur : quæ quia certis constant præceptis, & nunquam fallentibus, earum stabilitas per figuram cubicam explicatur. Deinde ut fortuna insistit globo, quippe inconstans : sic ars, doctrina, sapientia solidatur in quadrato lapide; ut scias, arti, non fortunæ, innitendum. Præterea, quemadmodum figure cubicæ species, quoquoversum jacta, versataque fuerit, recta semper consistit, ita vir Sapiens, ad omnia fortunæ tela semper est idem. Pingitur etiam Mercurius (aliis Hercules Gallicus dicitur) cum aurea ex ore catena defluente, & hominum auribus implicita, eos ad se trahente; quō quid aliud, quam saepius dictæ vis eloquentiae exprimitur, quæ per aures in animos hominum illabitur, eosque dicentis ad nutum trahit? Quidam in Mercurium caduceo instructum, & avolaturo similem ira festivè lusit :

Excellit tripli, quem cernis, Dote Minister,
Callidus & velox, Eloquioque potens.
Huius ab ingenio Regum fluxere Ministri,
Quos & Mercurios Aula diserta vocat,
Attamen haud isto constat perfectio *rrino*:
Mentiri accedat dos nisi quarta tribus.

IV. (d) Mercurio *vitalis* mactabatur, Ovidio canente 4. Metam.
Dis tribus ille focos totidem de cespite ponit,
Lævum Mercurio, dextrum tibi bellica Virgo,
Ara Joyis media est. Mactatur vacca Minervæ,
Alipedi vitalis, taurus tibi summe deorum.

Et cur vitalis ? ut docearis, à puero operam esse dandam sapientiæ, primâmq[ue] ætatem studiis virtutis ac bonarum artium dedicandam. Huc facit illud Poëta :

(d) *Cum vitalis Mercurio sacer* :

G g g 3

Dum

Dum tener est natus, generosos instruere mores.

Salomon de se ipso Prov. 4. *Nam & ego filius fui patris mei, & unigenitus coram matre mea; & docebat me, atque dicebat: posside sapientiam, posside prudentiam.* Mercurio præterea non vino, sed melle & latte sacrificabatur: vinum enim immodicè potatum, est inimicum sapientiae, &, quod citatus Salomon ait, *apostatare facit sapientes.* Mel verò & lac mel, quia bonum est, & favum dulcissimum gutturi tuo: *Sic & doctrina sapientiae anima tuae.* (e) Lingua etiam Mercurio sacrabantur, inque sacrificiorum eius fine cremabantur, ad ostendendum, quantū sapientis interdit expedita & versatilis lingua. Sacer parœmiographus testatur Prov. c. 15. *Lingua sapientum amat scientiam: os fatuorum ebullit stultitiam.* Quocirca Tullius lib. 3. de Orat. Eloquentia, inquit, nihil aliud est, quam copiosè loquens sapientia. Atque, ut alibi testatur idem, eloqui copiosè, modo prudenter, melius est, quam vel acutissimè sine eloquentia cogitare. Porro lingua Mercurio ideo etiam dicata est, quod conveniat illam subditam & obtemperantem esse rationi ac prudentiae, ut nec nimis præcipitanter procurrat, nec æquò tardior cunctetur. (f) Hinc Mercurius nudus supra *cancrum* marinum confidens, galero, caduceoque instructus, ac sinistra chelam seu acetabulum prehendens, docet, consideratè agendum, & festinandum lente.

V. Dicunt adhæc Poëtæ, Mercurium à Junone in judicium vocatum (quod etiam Marti in Arcopago accidit) quod Argō occiso, primus cæde manus inquinasset: sed à diis ipsum absolutum, projectis ad pedes eius niveis suffragiorum tesseris, atrisque; quoniam æquum fuerit, Jovi id jubenti obsequi. Ubi disce, justitiam potenter à potentibus premi:

Dat veniam coruīs, vexat censura columbas. *Iuven.*

Jupiter enim postquam Inachi fluvii filiam Io violavit, ut flagitium celaretur Junoni, puellam transformavit in juvencam, adeoque ex homine bestiam fecit. Argum præterea, custodem juvencæ à Junone appositum, per Mercurium interficiendum curavit. (g) Mercurius homicidium in auctoritatē imperantis rejicit: Dii Jovis indignationem veriti, absolverunt patratae cædis Mercurium. His gradibus ascendunt crima. Verissimè sapientissimus Rex Prov. 19. *Multi colunt personam potentis.* Et Siracides c. 7. monet Judicem: *Ne extimescas faciem potentis, & ponas scandalum in æQUITATE tua.* Scilicet ob respectum iniquum deflectendo à recto justitiae tramite. Severè, justèque Deus præcepit Mosi

ob

(e) *Cur lingua Mercurio dicata?* (f) *Cancer Mercurii.* (g) *Judicium corruptum.*

ob scandalum Hebræorum Magnatum, idolum Beelphegor publicè adorantium. Num. 25. *Tolle cunctos Principes populi, & suspende eos contra solem in patibulis: ut qui populo fuere duces sceleris, sint exemplum supplicii.*

VI. (b) Sed quare mercatorum, impostorum, furum Præsidem ac Patronum antiqui putarunt esse Mercurium; eiisque collo sacculum nummarium appenderunt? Respondet Natalis Comes, hoc ideo factum, tum quia eloquentia cum malo & flagitioso ingenio conjuncta multas fraudes invexit in genus humanum; tum quia quibus Mercurii planeta in ortu dominatur, illorum ingenia dicuntur ad furtæ, & ad omne astutæ ac nequitiae genus accommodata. Nam cum siccus & calidus sit hic planeta, verfutos facit & facundos homines, atque ad omnem calliditatem celerrimos: tot enim habet Mercurius in cælo motuum varietates, & tergiversationes, quot simul omnes reliqui planetæ. Nam modò procedit, modò retrocedit: modò sublimis est, modò depresso: modò celerrimus, modò stare videtur. Ego verò crediderim; Mercurium fallaciæ inventorem ac concinnatorem ideo factum à Poëtis, quia, cum in furtis ipsa delectet ars fallendi & furandi, opus est ingenio ac solertia: unde furtorum optima, quæ ingeniosa. Certè Magnus Augustinus narrat, lib. 3. Conf. c. 4. se puerum cum sociis sublegisse pira ex alieno horsto, non ob ipsa pira, sed ob artem & fallaciæ in pîris furandis adhibitam. Ritus erat, inquit, quasi titillato corde, quod fallebamus eos, qui hæc à nobis fieri non putabant, & vehementer nolebant. (i) Quod autem Mercurius Superos adierit ac inferos, etiam ad mercatores pertinet, quibus ad sua lucra per terræ, marisque per vitæ mortisque pericula tendendum, adeoque limen utrumque vitæ ac mortis terendum. Poëta canit:

Impiger extremos currit mercator ad Indos,
Per mare pauperiem fugiens, per saxa per ignes.

Quid, quod Mercatorem disertum esse oportet, & Mercuriali instructum lingua, ut emptores sibi comparet. Horatio teste,
Laudat, venales qui vult extrudere merces.

Et utinam tantum laudet, non etiam vitiet, & quas vitiavit merces, obtrudat pejerando. Sacculus è collo Mercurii pendens, ostendit, opes male partas, in jugulum redire parantis, eumque strangulare. Prov.
Qui congregat thesauros lingua mendaci, impinget ad lachinos mortis.

VII. (k)

(b) *Cur Mercurius furum deus?* (i) *Cur Mercatorum?*

VII. (k) Mercurius à parvo puerō mentiri constievit & furari: scilicet qualis parens, talis filius. Ut numerus iniri stultorum non potest, sic mentientium. In hac schola, Alphabegarii, & qui cubito tergunt nasum, robustissimis valent mendaciis. Talis fuit puer ille, Aper nomine, de quo Bauhusius lib. 3.

Unguis à teneris, primaque à veste genarum

Mentiri didicit Cretibus ortus Aper:

Succrevere doli barba crescente: bisulca

Quæ fuerat puerō, lingua trisulca viro est.

Notus est apodus de puerō furunculo (nam à mendaciis proximus ad furtā transitus, doctor in utrisque est Mercurius) qui cùm plura in diem, ac majora crescentibus annis, matre probante, furaretur; proximus patibulo, simulato cum matre colloquio, atriculam ei mordicus abscidit. Accusatus non furti modo, sed etiam impietatis in parentem, respondit, se ultionem repetuisse de perditionis sue autore. Si enim castigasset me, inquit, mater, cùm ei librum detuli, clam discipulo sublatum, nunquam futurum fuisset, ut tam infamis mortis damnarer. Sic è funiculis torquentur funes, quibz denique implicatur & frangitur gula.

VIII. (l) Meliora doceat juventutem Mercurius biceps, aut etiam triceps; cuius statua dupli, aut triplici capite prædita, olim in biviis ac triviis collocabatur, ad indicanda viarum discrimina. Statuis hisce solebant viatores lapides accumulare, Deum hoc modo remuneraturi, ut Iapidum aggestorum acervò fieret ejus effigies & cultus prætereuntibus notior ac religiosior. Meminit hujus moris Salomon Prov. 26. *Sicut qui lapidem mittit in acervum Mercurii: ita qui tribuit insipienti honorem.* Ethicè monemur, ea tantum sequenda esse, ad que Deus & natura nos reddit idoneos; cùm summæ fatuitatis & dementiæ sit, aliquid invitâ, quod aiunt, Minervâ suscipere & prosequi. *Negne enim è quovis ligno fit Mercurius.* Et quia mentis humanæ tanta est exxitas, ut quâ viâ sit eundum, planè ignoret, recurrentum est ad eum animo supplice & demisso, qui est, *Via, Veritas, Vita.* Certe Socrates apud Platonem asseverat, eâ solùm esse pergendum viâ, quâ Deus dicit. Hinc adagium: *Mercurio dextrò,* id est, propitio & favente aliiquid aggredi. Extat de hoc acervo Mercurii elegans epigramma apud Alciatum, hoc lemmate: *Quà dii vocant: eundum.*

In

(k) *Qui mendax, & furax est.* (l) *Eundum, quâ Deus vocat.*

In trivio mons est lapidum: supereminet illi
Trunca dei effigies, pectore facta tenuis.
Mercurii est igitur facies; suspende viator
Serta deo: rectum qui tibi monstrat iter.
Omnes in trivio sumus, atque hoc tramite vita
Fallimur, ostendat ni Deus ipse viam.

Docemur insuper hoc emblemate, nihil nos, quodcunque vita gen-
nus eligamus, posse proficere, nisi magistrum aliquem probum, doctum-
que nobis ad imitandum proponamus, qui sit instar alicuius *Hermæ*,
viae dux & director. Eius statua facta est pectore tenuis; quia nihil præ-
ter consilium, exigitur a præceptore; cætera præstanda discipulo, &
monitis obtemperandum; qui suspendit serta deo, si docilem se præbeat
& gratum.

IX. Sed redeamus ad Salomonem, cuius proverbium sic explicari potest. (m) Sicut Mercurius vivus, fuit inventor & præses artium ac sapientiæ, & eloquentiæ, ac proinde honore dignus; statua vero Mercurii, utpote Iapidea & inanimis, nec fari, nec sapere potens, nullo est cultu & honore affienda: Sic pariter Sapiens, quasi unus Mercurius, honorem & venerationem meretur; insipiens vero, & iners, et si propter genus aut opes prostet adorandus vulgo, quasi fictus & pictus Mercurius, non est capax honorationis. Hinc Prisci olim statuam Mercurii, manibus, pedibusque mancam truncamque efformabant; immo deformabant, atque homines stupidos pardos, insulso & insipientes vocitabant Mercurios saxeos, ligneosve: unde Juvenalis in quandam stolidum. Sat. 8.

At tu

Nil nisi Cecropides, * truncoque simillimus Hermæ:
Nullo quippe alio vincis discrimine, quam quod
Illi marmoreum caput est, tua vivit imago.
Ergo ut miremur te, non tua; primum aliquid da,
Quod possim titulis incidere præter honores,
Quos illis damus, & dedimus, quibus omnia debes.
---- miserum est aliorum incumbere famæ,
Ne collapsa ruant subductis testa columnis.

Hic observa ex adducto Salomonis proverbio, nonnunquam in SS. Scriptura nominari deos gentilium, & ad earum fabulas alludi. Ut hic Mercurii meminit Salomon. Et Judith. c. 16. Nec percusserunt eum

Hæh (Ho-

(m) Inductus, Mercurius truncus. * Atheniensis solis Cecropis, Conditoris urbis, laudibus superbians.

(Holofernem) filii Titan. Et Job. ult. Pro corau stibii, quod erat nōmen filia Job, Septuaginta vertunt: *Cornu Amaltheæ*, id est, Cornu copiosum, dives, rerum omnium affluentia abundans. Sapienter aduent Expositores, cū Scriptura *Cornucopiae*, Sirenum, Orionis, Lamium, aut Gigantum mentionem facit, tantum utilitatem illis fabulis significari, non verò falsitatem ullam nobis propinari. Quod suo modo ego de hac Ethica Symbolica intellectum velim, & in præfatione, pluribus monstravi.

S Y M B O L U M X C V I I I,

Vulcanus, ignis deus.

Ex Variis.

Ethicè.

1. Quid sit lampada tradere. 2. Fabrorvm labor, & eius expositiæ Ethica. 3. Opifices industrii. Imperiti & improbi. 4. Vulcanus cælo & convivio deorum exclusus, quid indicet. 5. Cæcus amor nubentium.

Vulcanus, teste Servio dictus est, quasi *Volcanus* quod flamma per aërem volet. Varro autem à majore vi ignis & violentia hoc ipsum accepisse nomen tradit. Appellatus etiam est *Mulciber* à mulcendo ferro: mulcere enim, inquit Festus, est mollire, sive lenire. Ex diis etiam hic deus est ortus, Jovis quippe & Junonis filius, quem parentes ob deformitatem cælo dejecerunt in *Lemnum* Egæi maris insulam, ubi ab Euryone, *Oceani* filia, & *Thetide* nutritus est; vel, ut aliqui volunt, à *simis*. Eo autem casu, quo ex olymbo decidit, fregit pedem, & claudus est factus. Officinam habet in memorata insula una cum *Cyclopibus*, ministris suis. In *Ætnæ* quoque montis cavernis subterraneis, perpetuo exæstuantibus igne: itemque in *Lipara*, una ex *Æoliis* insulis, ferrum, ad incudem cum operis suis fabrilibus exercet. Virgilius eius laboribus, *Hieram* insuper insulam, Siciliæ proximam, *Ætnæque* & *Lipara* vicinam attribuit. 8. *Eneid.*

Quam subter specus, & Cyclopum exesa caminis
Antra Ætnæ tonant validisque incudibus ictus.

Audit.

